

Nlir nnap-nlà AYakubu

¹ Nlir va ta fa ka atak aYakubu u uzwal Inan ká uzwal aPonzhi uYēsu Kēristi na a ga atak akum ijili pa igbapchi aman pa parəm, va lyan ka ashe apambin a. N re anung awo.

Nna nnandər ka aghan

² Ógənanɡ mi, ilum va pa kpaktak mmà nna nnandər ka asal pa ɔngɔng a ya wo te, o dər ishi wo wa onəm oga nchang igwak.

³ Kakuł o nyinyi pa mmà nna nnandər wo i nak wo o tong onəm oga nkar igwak ka nzhing.

⁴ Re nkar igwak wo ka nzhing a yəl inok pa kpaktak na o tong nzwan ka ashe asal kan o tong onəm oyenyen kat.

⁵ A ya pa unəm ro ka ashe wo a lang aghan te, uza a chál ka atak Inan uva i na iyaṃ nza unəm nggo ká nkpaktak igwak wò te, uza i na á na byet. Kakuł uza ya ka mbaṅg fu kat.

⁶ Re uza a chál Inan ka ashe nna nnandər, kang uza a ya unəm uga igwak pa iparəm kat. Kakuł unəm uga igwak pa iparəm ka nnap te, uza wa igum ndəng iwa va atak i pyep te, i ga ká wa nva i dom a.

⁷ Apir anəm wa ava ta te, kang uza a rəng pa nna o ya iyaṃ ro ka atak aPoyi-Inan kat.

⁸ Uza unəm uga igwak pa iparəm. Uza i sat pa chak ka ashe iyaṃ va uza i nəm kat.

Nkun ká idur

⁹ Unəm uga ngwa Inan va kukun te, re uza a lan. Kaḱul Inan rup ka na chit.

¹⁰ Unəm uga ngwa Inan va ká idur te, re uza a lan kaḱul nva Inan yen ka na a. Kaḱul idur pa te, i watar watar wa ntok mbaḷ ipəpa.

¹¹ Alum i won ka nsur te, i shi mbaḷ ipəpa va ta mbəbaḷ i lwai, i tak ka mbin, mbibyen i lak. wantana kpa unəm uga ndur i kú ka anung inok nram idur wò.

Mmà

¹² Nnap-nnənan a təm chit mbyet ka apal ishi anəm va kaḱ igwak ka nzhing ka ashe mmà va ya na kan uza kaḱ igwak ka a. Kaḱul mí na imwa iriri iga mbyet mbyet á na va uPoyi-Inan sar nnap-nləla ônəm va man na a.

¹³ A yà pa mmà nna a ya unəm te, kan uza a là pa Inan ká mmà va ta kaḱ. Kaḱul mí mà Inan ká iyaṃ ina kaḱ. Nna kan uza i mà unəm ká iyaṃ ina kaḱ na kpa.

¹⁴ Mmà nna a ya unəm te, yà ba ka atak nrəng nna va ka ashe igugwak kan i nak na ka asal á na.

¹⁵ Nrəng nna va ka ashe igwak anəm te, nna i mar nnap-mbángbang. Nnap-mbángbang i ga i mak nnyi te, i ba ká ikú.

¹⁶ Ógənanṅ mi omanman, kan o man ma lam wo kaḱ.

¹⁷ Nza imwa ibyenbyen nggo ká iga nnandər te, i fa ka apabur i vang ka atak Inan uPon va nəm atak atántàn a. Ngaḃan ngga mba ka atak akpárkpàr ro yà ka atətak pa dap kaḱ.

¹⁸ Uwà yak ká ishi wò pa o na iriri iga mbyet mbyet ayi ka atak nnap-nlè wò ngga nnandər na

i tong chit ka ashe iyam va uza nem pa kpaktak wa iyam ngwap ngga nyal mpyal a.

Nfe nnap ka nnenem

¹⁹ Ógənanang mi omanman, o nyi nva ta. Re nza unəm nggo a gwong achwang a fe nnap ka pa kəlak. Kang uza a ghan ka nla nnap kat. Kang uza a ghan ka nfəl igwak ka apal ishi nnap kat.

²⁰ Nfəl igwak pa kəlak kəlak te, i yə ka nyəl nnap nnəm nnənan nji Inan kat.

²¹ Kakul nva ta te, o swang nnap nnəm ngga nnəm jan ka cho pa kpaktak. O gbəng ka nza apir inga nggo. O man ka nnap-nlā Inan va bál ka ashe igwák wo nzəng ka nnap nnəm ngga nra ká ishi ka mپیال. Nnap-nləla va ká ichumchum iga nna iriri awo a.

²² Kang o lam ishi wo kat. O fe nnap nləla ká achwang na chwat kat, o nəm inok nəm ka kpa.

²³ Nza unəm nggo va fe nnap-nlā Inan kan uza nəm inok ka kat te, uza mal dakdak ká unəm va i dər asal-awu wò ka ashe aboka.

²⁴ Kakul nvəngva uza i dər asal-awu wò va ta pa dakdak te, uza i ga ta byet te, uza i kong ká asal-awu wò va uza ka ya ka ashe aboka a.

²⁵ Nza unəm nggo va nnyi i dər ka ashe nnap-mpakpak Inan nnənan nva i fən onəm ka atak nnap-mbāngbāng oza, kang uza i ga mpyal ka nkpəkpak, uza i kong ka kat, i nəm inok ka te, uza i ya nnap nnənan ka apal ishi nza iyam nggo va uza i nəm a.

²⁶ Unəm ro uwa yə ka ashe wo rəng pa o wá Inan nna ɗakbo? A yə pa uza i kpán anung wò kat

te, uza ka nlam ishi wò. Nwa Inenan i sat nnap nlakchi.

²⁷ Nwa Inan va Inan uPon dər sat nnənan ka mpyal wò te, nna pa unəm a nakshi ka ovankpələng, ka ochar va tēm okpari obar oza kú chit, kan oza ka ashe mbək anung a. Re unəm a kpán ishi wò pa dakdak le kan iyam ina iga apambin va ta a vyap na ka.

2

Awon ka apal ishi ntáp onəm

¹ Ógənanɡ mi, mmawó va onəm oga nna nnandər ká uponzhi uYesu Kəristi va ká ichumchum te, kang o tap onəm ka.

² I là pa unəm uga ndur ro a pá nkalbang ngga azənariya ká ilukwan inənan iga mbwai a ba atak mbut ka, kang uro uga nkun a pá aryakryak a ba mbut nva ta ká kpa.

³ Kang a yà pa o na ichumchum ûnəm va sham isham pa dakdak o là á na pa, <<Ga tēm ka atak ntəm nnənan va cho.>> Kang o là ûnəm uga nkun nnyi pa, <<Ta ka cho.>> Ka te, pa, <<Tēm ka mbin cho,>>

⁴ te ya na o nyám nvan ka ngəl akwali ká nrəng nnap nnga chit ka dō?

⁵ Ógənanɡ mi omanman, o gwong achwang pa dakdak na o fe. Inan yak onəm va apambin nak oza pa kukun te, uza nak oza chit tong onəm oga nna nnandər ka mbang gwak har uza nak oza ya iponzhi va chit uza ka sar nnap-nlà pa o na onəm oga mman wò a.

⁶ ká nnà te, o nak inəm ônəm oga nkun kať. Onəm oga ndur oma i nyán ká wo, i dàp wo i ga akwali ká kať dō?

⁷ Oma kpa ká nvyap adín anənan va ma ka ngwór wo ká kať dō?

⁸ A yà pà o kpak nnap-mpakpak va chit nnà ma lir ká ashe nnap-nlà Inan pà, <<Unəm a man uwan wò wa nva uza man ishi wò.>> Te, ya mmawó ká nnəm iyam inənan.

⁹ A ya nnyi pà o tap onəm te, ya mmawó ká nnəm nnap-mbángbang. Nnap-mpakpak aMusa i re wo kať, i pak wo pak. Kakul o tong chit onəm oga nfe nnap-nlà kať.

¹⁰ Unəm va pà kpaktak ká nkpak nnap-mpakpak aMusa kan uza ga gantal nro pà nzəng te, ya uza gantal oza chit pà kpaktak.

¹¹ UPonzhi Inan va là pà, <<Kang wa ra uchar anəm,>> kať te, uwa kpa là pà, <<Kang wa gbał unəm kať.>> A yà pà u ra uchar anəm kať, kang u ga u gbał unəm te, ya u tał unəm uga nggantál nnap-mpakpak chit.

¹² Kakul nva ta te, re nnap-nlà wo ká nnəm nnap wò a tong wa apir nji onəm va mí nap akwali ôza ká nnap-mpakpak aMusa ngga nfən onəm i re.

¹³ Unəm va i nyám nrwa igwak úwan wò kať te, Inan i yà ká nnap-akwali á na aga nnyám nrwa igwak kať na kpa. Unəm va nyám nrwa igwak nyám nnyi te, uza i yà ká nnəm ayər akwali Inan kať.

Nna nnandər ká inok

14 Ógənanɡ mi, iza byen ka ashe nva ta yà? Nna pa unəm a là pa mmawò ká nna nnandər kan uza ka nnəm iyam va i nyám kat a? Nna nnandər va ta i kamshishi kam dō?

15 Re i là pa ugənanɡ ro unungɡwan, kat te uchar yà ká ilukwan kat, kan iyam-nri yà ôza ka nzhi kat kpa a ba atak aro ka ashe wo.

16 Kang a yà pa uza a là á na pa, <<Inan a kamshi bu u ya iyam-nri ká iyam nsham ka atak va bu ga bu ya ká a.>> A ya nnyi pa nna u yà ká iyam va ta kang u dang na ká te, u nəm bíbyen dō?

17 Wa nnà ta kpa nna nnandər kang i yà nzəng ka nnəm nnənəp kat te, a tal iyam ikuku chit.

18 Unəm ro te, i là pa, <<Mmabu ka nna nnandər ji bu. Mmami nnyi te, unəm uga nnəm iyam va mí yiya.>> Te mi na aman á na pa, <<Nyám nna nnandər bu á mi va nzəng ka nnəm iyam va mí yiya kat. Mmami nnyi te, mi nyám nna nnandər mi abu ka atak nnəm iyam va mí yiya a.>>

19 U na nnandər na pa Inan pa izəng, uwa byet dō? A ya pa te, ya a byen pari. Aruhu-báŋgbəng na nnandər pa na kpa, ká nnà te, oza ka ntan ká ayər.

20 Ánəm ga mpərək, u dom pa ma nyám á bu pa nna nnandər kan nzəng ka nnəm iyam va mí yiya kat te, nnap nlakchi dō?

21 UPoyi-Ibərəhim nəm sang kang Inan yar na sat unəm uga nnap nnəm nnənən yà? Inan yar na sat unəm-nənən ka mpyal wò ka atak nnəm iyam va mí yiya na kat dō? Nna nva uza yichi

uyen wò uIshaku kakul nshi ka apal atak aga nshi iyam awop a.

²² U ya kat dō? Nna nnandər ká nnəm iyam va mí yiya a ga ka anung zəngtəng. Nna nnandər nandər va ta uza kur anung ká nnəm iyam va mí yiya a.

²³ A nak te, nnap-nlā Inan va ta a yəl chit. Nna là va pa, UIbərahim na nnandər ká Inan. Kakul nva ta te, Inan kun ishi ka pa nnap nnəm nnənan. Nna nak kan mí wór uIbərahim pa ukpa Inan.

²⁴ O dər te, o ya pa ka atak nnəm iyam va mí yiya na kan Inan i yar unəm pa uza unənan. Ka atak nna nnandər na chwat kat.

²⁵ wantana kpa ká uRahap uchar uga nram onungwan. Nnap nlā Inan là ayi pa uza bwam onəm oga nre oIsarila oga nsòng atak ka ashe nzhi wò. Uza kamshi oza har uza nyám asal akak ôza na oza a ga ká ikánkáng. Nnəm iyam iyaya va ta nak kan Inan yar na sat uchar uga nnap nnəm nnənan kat dō?

²⁶ Izər kang i yì òyi kat te, ya sat akum chit. wantana kpa nna nnandər kan nzəng ka nnəm iyam va mí yiya kat te, ya a nyang iyam ikuku chit.

3

Abələm anəm

¹ Ógənanng mi, kan mmakmak wo o tong onəm oga ndyang iyam kat. Wa nva o nyinyi pa mmayi va onəm oga ndidyang te, nna won mí nap akwali arwarwa ayi va i ji ajo oro ji a.

² Kākul nkpaktak yi i pat nnap ka asal pa dōngdōng chit. A yà pà unəm pat ka ashe nnap-nlā va uza i là kat te, ya uza unəm unandər pa chak uva nyi nkpán ishi wò pà dakdak a.

³ A yà pà mí pá ikan ípəri te, i ga ká unəm ka atak va unəm dóm.

⁴ O dər oga agirgi ndəng ka ngba nrup oza va ta kan pà ayər akámkám nna i pyep i dan oza i ga ka. ká nnà te, nyà acham ro abwakan nna i chi oza i gaḡaḡa i ga ka ka atak va onəm oga nchi oza i dóm pà oza a ga ka pà kpaktak a.

⁵ wantana abələm kpa. Kap ka ñiyen va ta te, i là iyam ichumchum iga ndaktak byet. Rəng nrup ashe ñzam. Kap ka nrurup va ta te, nyà apər pà dāpfinyang nna i pwak na.

⁶ Abələm wa apər. Ka ashe oga mban ngga izər anəm te, abələm nna ji ká iyam inga pà kpaktak. Nna i vyap nkpaktak izər, kan i nak iriri yi i kpán apər ka ashe ntəm yi. Abələm abángbāng va ta apər abángbāng aga nzhì onəm à māl apəpər.

⁷ Unəm uwa yà ká ichumchum ka apal ishi izhé iga anyin, ká inyil, ká iyam iga nkpán ka afu, ká iyam iga ashe ndəng har uza nyi nnak oza i nəm iyam va uza dóm a.

⁸ Nna kan unəm ro ya nyi nnak abələm pà a kpak nnap nnəm á na jiwò kat. Abələm iyam íbángbāng va i jul ka nnəm iyam inga kat. Abələm akàl abángbāng na pà gbai va i gbāl unəm gbāl a.

⁹ Ka abələm azəngtəng va i na adəngchi ûPoyi-Inan ka te, ka nna kpa i pwat owan yi va Inan a nəm oza wa ishi wò a.

¹⁰ Nnap nlā ngga adəngchi ka ngga mpwat i fa

ka ashe atam azəngtəng. Ógənanɡ mi, nva ta mal pa ka ya pa ka.

¹¹ Iwu ndəng yiyà va i bəl ndəng nnənan ka ndəng mbəngbəng ka anung zəngtəng dò?

¹² Ógənanɡ mi, ipipyān i yà ka ngwar awar ichu ka. wantana kpa ibəngbəng i yà ka ngwar awar ipipyān ka. Ndəng va nnənan te, i fa ká iwu ndəng iga mman ka.

Aghan aji Inan

¹³ Uda unəm uga aghan ka ashe wo uva kpán ipir nnàp kpán yà? Re uza a nyám ka atak apir ntəm nnənan ngga nnəm iyam ka ashe nra ká ishi va aghan i ba ka á.

¹⁴ A yà pa nna o yà ká ikpar ibəngbəng ka ashe wo nzəng ká ndom ishi te, kang o ngok ka, kang o nàp akwam n̄nandər ka.

¹⁵ Apir nnap va ta kang mí i wór pa aghan te, á fa ka atak Inan ka, aghan va ta aga apambin. A fa ka atak nrəng nnap nna nja anəm. A fa ka atak aShetan.

¹⁶ Atak va pa kpaktak ikpar kà, ká ndom ishi te, ikángkáng i yà ká ka. Iyam inga pa dōngdōng i wong ka ta.

¹⁷ Aghan va i fa ka atak Inan te, i yà ká adak ka. I ba ka ntəm ikángkáng, ká nnap nnəm nnənan ngga nra igwak, ká nkam nnap-nlà ngga nkamshi, ká nrwa igwak pa makmak. Pa dəkər te, i ba ka nnap nnənan. Nvan nnap ká na yà ka ashishe ka. Nlam asal-awu ōnəm yà ka ashishe ka kpa.

¹⁸ Ka atak ntəm ikángkáng va onəm oga nnap nnəm nnənan i ba ka te, katətak na mí ya nnap nnəm nnənan.

4

Nnəm ikpa ká apambin

¹ Iza i ba ká ikum ka ngbáng ikum ka ashe wo yà? Nva ta yà ka ashe wo kakul ndom iyam iga nfe nchang izər va i lung igwák wo pa dəkər dəkər a.

² O dom iyam pa makmak kang o ya kat te, a nak wo ka ngbáng onəm. Ndom iyam onəm mak ka ashe wo nna kan o ya kat te, o gbáng ikum, o lung ikum kpa. O ya iyam va o dom kat, kakul o chál ka atak Inan kat.

³ O chál te, o ya kat, kakul nrəng nnap wo ka na. O chál pa na o nəm nnap ngga nfe nchang izər wo ka.

⁴ Ónəm oga nyà ka nnandər kat. O nyi pa unəm va i dom iyam iga apambin pa makmak te, uza tal unəm uga nyang Inan chit kat dō? Nza unəm nggo va dom nnəm ikpa ká apambin te, yà uza unəm uga nyang Inan.

⁵ O rəng pa ka anung amwang kan nnap-nlà Inan là ayi pa, <<ARuhu va Inan nak ka ashe yi te, a kpar ikpar byet dō?>>

⁶ Ká nnà te, nnap nnənan va Inan i na ayi te, a mak ji ndom iyam ibángbāng va ji ka ashe igwák yi a. Nna nak te, nnap-nlà Inan là pa, <<Inan yang onəm oga nrup ká ishi byet. Onəm oga nyen ká ishi oza jiwo te, uza i nak nnap nnənan ôza.>>

⁷ Kakul nva ta te, o ra ká ishi Inan, o yang nnap aShetan na uza a chər atak wo.

⁸ O ba datkulung ká Inan na uza a ba dat ká wo kpa. O fa ka ashe iyam ibángbāng ônəm oga

nnap-mbángbàng. O nal igwák wo a byen ônem oga ìgwak ìparpar.

⁹ O tàm ká nlak ìgwak, o yéng nzəng ká nlak ìgwak pà makmak. Re nyèl wo a wal nlak ìgwak. Re nchang ìgwak wo a wal mbàng iwu.

¹⁰ O ra ká ishi Ínan na uza a rup ká wo.

Nya mpat onəm

¹¹ Ógənanɔg mi, kan o vyap adin owan wo kat. Nza unəm nggo va i là iyam ibángbàng kà apal ishi awan wò, kat te i ya mpat owan wò te, uza kà nla iyam ibángbàng kà apal ishi nnap-mpakpak kan uza kà ngəl akwali nnap-mpakpak kpa. A yà pà unəm i gəl akwali kà apal ishi nnap-mpakpak te, yà uza unəm uga nkpəkpak kat. Uza sat unəm uga ngəl akwali chit kà apal ishi nnap-mpakpak.

¹² Inan pà izən, uwa byet i pak nnap, uwa byet i gəl akwali kpa. Uwa ká ichumchum iga nna iriri ônem, kang uwa ká ichumchum iga yiyar kpa. U rəng nnyi pà mmaɓu uda kang ɓu ya mpat owan ɓu yà?

Ichən kakul onəm oga nnok

¹³ Ó gwong achwang na o fe, mmawó va o là pà, <<Re i ga achen kà mbin ro nda, kat te ipin, na i ga i təm kà ta izun pà izən i nəm iyap na i ya mbwai kà pà makmak.>>

¹⁴ Re o rəng. Kakul o nyi iyam va i fa ká ipin ikpakpak kat. Mmawo wa inanəng va i fa te, i sat kat, i mor i làr a.

¹⁵ Iyam va mal pà kà o là te, nna pà, <<Inan kà man te, ká i làr na ká i nəm nyang kà nyang.>>

¹⁶ Ñyangmata te, mmawó onəm oga nnok nzəng ka nkak ishi. Apir nnok ka nkak ishi va ta te, iyam ibáŋgbang.

¹⁷ Kakul nva ta te, unəm va nyi iyam va nyi mal pa uza a nəm kan uza nəm ka te, ya uza ka nnəm nnap-mbáŋgbang.

5

Nwon onəm oga ndur

¹ Ónəm oga ndur, o gwong achwang na o fe. O yəng pa bóbo kakul nlak igwak pa dongdong va i ga nya wo a.

² Idur wo mwan chit. Idóp ri ilukwán wo chit kpa.

³ Azənariya ká azurfa wo bán chit, mbəban nyám chit pa mmawó va ka ndur te, o ga nkú i kùr wa nva apər i ri atak a. Mmawo ka nchen ka ashe nra ngga nkùr. Ka nna kpa te, na mmawó ka mbut idur ishi wo dò?

⁴ Ó mwa mbwai inok onəm va o nak pa a nəm inok awo ka te. Kakul nva ta te, oza ka nyəng ayən. Ayən onəm va bən iyam-nrì ka ashe irám wo te, a ga tar achwang aPonzhi Inan uga Ichumchum chit.

⁵ Ntəm wo ka ashe apambin va ta te, o təm ntəm ngga nna nfe nchang ízər wo ka mbut iyam iga nfe nchang igwák wo. O kang ízər wo chit o mwal wa ina va kur chit pa ma pa oza a.

⁶ O gəl akwali o nak ri unəm va unənan. O gbal unəm va dáp atam ká wo ka pa dapfɪnyang ka te a.

Nkar igwak ka aduwa

⁷ Kakul nva ta te, ógənanang mi, o təm ka ashe nkar igwak har ilum va uponzhi uYesu i vang. Re o dyang ipir nnəp ka nnap nnəm anəm uga ngwap iram. Uza i lok ivar iga amən kan uza i suk iyam. Uza i lok har alum mbubun i ba i chu.

⁸ Mmawo kpa re o tong onəm oga nkar igwak. O tong ka nkam kakul nvang aPonzhi uYesu dat chit.

⁹ Ógənanang mi, kan o là pa nnap owan wo rwam wo chit kat. Kakul kan Inan a won a gəl akwali a ri wo kat. Unəm uga nnap-akwali dat chit ka nchu.

¹⁰ Ógənanang mi, o rəng onəm oga nkam nre ka atak Inan va. Re i dyang apir nnap nnəm oza ngga nkar igwak ka ashe nza apir mbək anung nggo.

¹¹ Onəm va ka nkar igwak ka nzhing te, re i yar oza a sat wa onəm va Inan nak nnap nnənan ôza chit. O fe nnap nkar igwak ka nzhing va fe uAyuba ka kar ka ashe nra va ndaktak ka ya na a. O nyi iyam va nyi Inan won nəm ka na ka nvəvang kpa. Kakul uPonzhi Inan unəm uga nrwa igwak pa makmak.

¹² Ógənanang mi, iyam va ji pa kpaktak te, kang ó sóng anung ká apabur, kat te ká apambin kat. Re nza apir nsóng anung nggo te, kang ó sóng kat. Re ó là pa, <<a>> te, a yà n-a va ta. O là pa, <<o'o>> te, a kùr ka n-o'o va ta. Kakul kang Inan a wong a gəl akwali a ri wó kat.

¹³ Unəm ro uwa yà ka ashe wo ka mbək anung dakbo? Re uza a nəm aduwa. Unəm ro uwa yà ka ashe wo ka nnəm nchang igwak dò? A mal pa uza a shi nnap, uza a dəngchi Inan ka.

¹⁴ Unəm ro uwa yà kà ashe wo rurwa dò? A mal pà uza a re nre kà onəmbak oga ngwa Inan na oza a nəm aduwa á na. Oza a bəl mmì á na ká ishi kà ashe adin aPonzhi uYesu Kəristi.

¹⁵ Aduwa va ma nəm kà nnandər te, i tan unəm uga arwa va ta. UPonzhi Inan i na ikánkáng á na. A yà pà uza nəm nnap-mbángbang te, uPonzhi Inan i yar á na.

¹⁶ Kakul nva ta te, o là nnap-mbángbang wo ówan wo. O nəm aduwa ówan wo na uPonzhi Inan a tàn oza. Aduwa anəm uga nnap nnəm nnənan ká ichumchum pà makmak.

¹⁷ Uliya kà yà unəm wa nji yi na kpa. Uza nəm aduwa kà nzhing pà kan ivar a pəng kat. Te wa nnà ta ivar pəng kà apambin kat har izun pà ishatding kà apye pà kpadging.

¹⁸ Uza nəm aduwa kadi te, apabur pəng ivar, iyam-nri byen kà ashe mbin.

¹⁹ Ógənanng mi, a yà pà uro kà ashe wo a pat asal aga nnandər a re, kan uro a le kà na kà asal kadi te,

²⁰ re o nyi pà unəm va pà kpaktak a fa ká unəm uga nnap-mbángbang kà ashe nnap-mbángbang bángbang te, uza kamshi iriri anəm va ta chit ká ikú. Uza i nak unəm va ta i ya nyar nnap-mbángbang va uza nəm pà makmak a.

Tarok Bible

The Holy Bible in the Tarok language of Nigeria

copyright © 2024 Luke Initiative for Scripture Translation

Language: (Tarok)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

501af3c5-12fd-5965-ade7-9600b2d02717